

24 OCT 1999

Ezam-Cabar

EZAM CABAR KERAJAAN DAKWANYA

KUALA TERENGGANU, 24 Okt (Bernama) -- Ketua Pemuda Keadilan, Mohd Ezam Mohd Noor mencabar kerajaan untuk mendakwa mengikut Akta Rahsia Rasmi berhubung kenyataannya mengenai enam kotak rahsia kerajaan yang disimpan di luar negara.

Beliau mempersoalkan mengapa belum ada sebarang pengumuman mengenai hasil siasatan kes itu dan tidak ada dakwaan dibuat terhadapnya sedangkan polis telah beberapa kali mengambil keterangan daripadanya.

"Saya mencabar kerajaan mengapa sehingga sekarang tidak ada pengumuman, tidak ada dakwaan yang dibuat terhadap saya...saya cabar (Perdana Menteri Datuk Seri Dr) Mahathir Mohamad dakwa saya di bawah Akta Rahsia Rasmi," katanya ketika berucap pada satu perhimpunan Pemuda Keadilan di sini malam tadi.

Ezam berkata dia bersedia untuk menghadapi segala kemungkinan dan sekiranya ditahan, barisan pemimpin pemuda yang lain akan meneruskan perjuangannya dan parti itu untuk menuntut keadilan.

Beliau juga mencabar Timbalan Perdana Menteri Datuk Seri Abdullah Ahmad Badawi untuk mendakwa dan menahannya serta mengeluarkan hasil siasatan berhubung beberapa tuduhan yang dikenakan terhadapnya mengikut Akta Hasutan.

Katanya sudah sebulan dia disiasat mengikut Akta Hasutan berhubung laporan polis yang dibuat mengenai rasuah yang didakwa dilakukan oleh Menteri Kewangan Pertama Tun Daim Zainuddin dan Menteri Perdagangan Antarabangsa dan Industri Datuk Seri Rafidah Aziz.

"Sudah berapa bulan fail dibuka...hari ini saya cabar...tunggu apa lagi, kalau esokpun mereka dakwa saya, saya dah bersedia di mahkamah. Mengapa tidak ada dakwaan, tidak ada keputusan siasatan yang dibuat," katanya.

Ezam yang sebelum ini ditahan kerana terlibat dalam perhimpunan haram di Masjid Negara pada 19 Sept lepas, turut mengaku bertanggungjawab mengetuai perhimpunan itu.

"Malah sayalah yang mengajak rakyat untuk bangkit bersama menentang kezaliman bermula 18 Sept di seluruh negara dan pada 19 Sept di Masjid Negara," katanya.

Beliau mendakwa perhimpunan aman yang dimulai dengan sembahyang hajat itu bertukar menjadi peristiwa keganasan polis apabila polis cuba menyuraikan mereka dengan menggunakan gas pemedih mata.

Pada majlis malam tadi, petugas parti Keadilan turut mengikut langkah PAS mengutip derma daripada orang ramai yang hadir pada ceramah itu.

-- BERNAMA

SN SBS MAI